

**Timersornermik pingaartitsinerput, timersornermullu aningaasaliissuteqartarnerput naammaginarnersoq naammaginanginnersorluunniit pillugu apeqquteqaat aallaavigalugu oqallinneq.**

(Inatsisartunut ilaasortaq Peter Olsen. Inuit Ataqatigiit)

**Akissuteqaat**

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Naalakkersuisut qutsavigiumavaat Inatsisartunut ilaasortaq, Peter Olsen, Inuit Ataqatigiit, timersornermik pingaartitsinerput, timersornermullu aningaasaliissuteqartarnerput naammaginarnersoq naammaginanginnersorluunniit pillugu apeqquteqaat aallaavigalugu oqallisissiaanik.

Naalakkersuisut timersorneq tapersersorluinnarpaat, tulleriiarinerminnilu pingaartitarilluinnarlugu, timersornermi tassaamat inuiaqatigiit sutigut tamatigut peqqissumik toqqissimasumillu inuunerannut ilaalluinnarmat, taamatullu imigassamut, aanngajaarniutitut atornerluisarnermut pinerlunniartarnermullu pinaveersaartitseqataasuummat.

Naalakkersuisut timersornermut tapersersuisutut kisimiinngillat. Kommunit inatsisitigut pisussaaffeqarnerup saniatigut sulilluarnermikkut inuiaqatigiit akornanni timersornerup aallunneqarluarneranut siuarsarneqarneranullu ingerlatsilluartuupput. Suliffeqarfiit namminersorlutillu inuussutissarsiortut aamma timersornermut annertuumik tapersersuisuupput. Peqatigiiffinnut amerlasuunut aamma timersoqatigiiffiit kattuffiinut pisortat aningaasaliissutaannut naammattuaannangitsunut sponsoriusarnermikkut aningaasanik pisariaqartinneqartunik aamma tapersersuisuusarmata. Kommunit, suliffeqarfiit, namminersorlutillu inuussutissarsiortut tapersersuinerannut nersualaarinninnermik tamakkiisumik Naalakkersuisut apuussa qarfigerusuppaat.

Naalakkersuisut Kalaallit Nunaanni Timersoqatigiit Kattuffiat aamma Elite Sport Greenland angusaqarnissamut isumaqatigiissuteqarput piffissamut 2023-2027-imut, Timersorneq timigissarnerlu pillugit Inatsisartut inatsisaanni ulloq 6. juni 2015-imeersoq naapertorlugu. Angusaqarnissanut isumaqatigiissut ataatsimoorussamik aqutsinermut illuatungeriit akornanni sakkuuvoq, siunertaqarlunilu qularnaarinissamik suleqatigiittoqarnissaanik Naalakkersuisut naalakkersuinikkut tulleriiarineranni aamma Kalaallit Nunaanni timersoqatigiit kattuffiata akornanni illuatungeriit ingerlatsinissanut isumalluarnerat, matumani aamma angusassanut piumasaaqatit, nalunaarusiortarneq naatsorsuusiortarnerlu eqqarsaatigalugit tunngaviusussat aalajangersaavigineqartarnerisigut. Angusaqarnissamullu isumaqatigiissutikkut ilaatigut Naalakkersuisut Timersoqatigiit Kattuffiata takorluugai anguniagaalu tapersersorpaat – Kalaallit Nunaata 2030-imi nunarsuatsinni timimik aalatitsinerpaatut inissisimassasoq.

Naalakkersuisut tapiissuteqartarput inuit tamat timigissartarnerannut Aningaasanut inatsimmi Timersoqatigiit Kattuffiannut timersornermut kontumi pingaarnermi 40.94.13 Timersornermut tapiissutitigut. Tamatumani immikkoortitsisoqarpoq 17.760 mio. kr.-inik aningaasat ukiuannut 2024-imut, aammalu ukiunut missingersuusiorfiusunut 17,7 mio. kr.-inik. Tamatuma saniatigut Naalakkersuisut Elite Sport Greenland-imut tapiissuteqartarput, siunertaqartunik nunatsinni timersornerup nunarsuarmini unammillersinnaassusiata siuarsarneqarnissaannik, minnerunngitsumik nunat tamalaat akornanni pikkorivissut timersortarnerat - eliteidræt – katersuuttarnerini peqataasarnernut. Tamatumani immikkoortitsisoqarpoq 1.1 mio. kr.-inik aningaasat ukiuannut 2024-imut, aammalu ukiunut missingersuusiorfiusunut 1.1 mio. kr.-inik.

Tamatumalu saniatigut Timersoqatigiit Kattuffiat aamma Elite Sport Greenland pissarsisarput Danske Spil A/S-imi kaaviiartitaanit aningaasaliiffigineqartarput. Aningaasaliissutit immikkoortitsisoqarpoq 20.952 mio. kr.-inik Timersoqatigiit Kattuffiannut, GIF-imut aamma 3.813 mio. kr.-inik Elite Sport Greenland-imut ukiumut aningaasanut inatsiseqarfiusumut 2024 kontumi pingaarnermi 40.94.21, Danske Spil A/S-imi kaaviiartitaanit Kalaallit Nunaata pisassaanit tapiissutit.

Timersoqatigiit kattuffiata aningaasaliissutit timersornermi kattuffinnut ataasiakkaanut agguaattpai agguaassisarnermut maleruagassat atuuttut naapertorlugit. Agguaassisarnermut maleruagassat Timersoqatigiit Kattuffianni siulersuisunit aalajangersarneqartarput, agguaassisarnermillu aaqqissuussineq atuuttoq siunertaqarluni patajaatsunik tunngavissaqartitsisoqarnissaanik pitsaasumik ineriartortitsisoqarnissaanut kattuffinni immikkoortuni pineqartuni, aaqqissuussinerlu qularnaarisussaavoq kattuffiit aamma Timersoqatigiit Kattuffiata ataatsimoorussanik annertuuni pilersaarutaasunik piviusunngortitsisinaanissaanik.

Timersoqatigiit kattuffiat aamma Elite Sport Greenland timersornermik ingerlatsinermik aaqqissuussisartutut qitiusutut kissaatiminnik saqqummiussinikuupput, aningaasaliissutaasartut malunnaatilimmik amerlineqartariaqarnerat pillugu siuliani eqqaaneqareersutut inatsisit naapertorlugit pisussaaffiusut tamakkiisumik piviusunngortinneqarsinnaassappata.

Tamatumalu saniatigut Timersoqatigiit Assammik Arsartartut Kattuffiat (TAAK) 2023-imi aningaasanut inatsisikkut immikkut ittunik ilassutitut aningaasaliiffigineqarput. Aningaasaliissutit annertussusilerneqarput TAAK-ip qinnuteqaataa tunuliaqutaralugu, tapiissutillu taakkua atorneqarlutik Amerikap Avannaani Arnat assammik arsartartut (NORCA) VM-imut anngunniunnermut atatillugu Nuummi unammersuaarnerannut.

Naalakkersuisut kissaateqarput timersornerup silarsuaani pissutsit atugassarititaasullu pitsaanerunissaannik. Tamatigut ajornaatsuinnaasangilaq ullutsinni aningaasaqarnikkut killiliussat naammassinnaanerat timersornerup silarsuaani ingerlatsisut kissaataasa piviusunngortinniartarneranni. Taamaattumik pisariaqartitsisoqarpoq nunatsinni timersornermik ingerlatsinernut aningaasaliissutaasartut malunnaatilimmik amerlanerunissaat,

nunatsinni timersorneq ulluni maanna atuuttuni nutaaliaasuni atugassarititaasunut  
sukkasuumik ineriartorfiusuni piumasaqaatinut malinnaasinnaassappat.

Taamatut oqaaseqarluta Naalackersuisuni qilanaaraarput inimi maanna soqutiginartumik  
oqallittoqarnissaa.